

NAIM PERGI TAK KEMBALI

Oleh: Siti Nuradibah binti Abdul Ghani, 1171249,
Fakulti Pengajian Bahasa Utama (FPBU), Universiti Sains Islam Malaysia (USIM)
Disiarkan pada 14 Ogos 2020

Bergema azan menandakan kelahiran seorang imam dan pemimpin dalam keluarga kami. Muhammad Aiman Naim bin Zaidi nama diberi. Dia dibesarkan di Temerloh, Pahang sejak kecil bersama keluarganya.



Muhd. Aiman Naim (paling kiri) bersama keluarganya.

Saya mengenali Naim yang merupakan sepupu saya ketika masih kecil. Semasa saya mengikuti pendidikan prasekolah di PASTI Al-Husna, dialah yang mengayuh basikal setiap hari untuk menjemput saya pulang ke rumahnya. Kemudian, ibu akan mengambil saya di sana.

Dia seorang yang pintar, rajin, ceria dan mempunyai sifat kepimpinan yang tinggi. Masih teringat-ingat dengan senyuman dan gurau sendanya dahulu. Kadang-kadang dia mengusik saya dan menyebabkan saya ketawa mengekek melihat gelagatnya.

Naim seorang pelajar yang bijak, berbakat dan mempunyai ciri-ciri seorang pemimpin. Dia lebih bijak dari saya dan keputusan peperiksaannya sentiasa cemerlang sehingga melayakkannya menerima biasiswa tahunan daripada Yayasan Pahang.

Dia juga berkebolehan mengalunkan bacaan ayat-ayat suci al-Quran dalam nada suara yang merdu. Sewaktu di sekolah rendah, Naim diberi kepercayaan mengetuai Majlis Khatam Al-Quran.

Pada tahun 2010, Naim menyarung kemeja sekolah berwarna merah jambu dan kot hitam apabila dilantik sebagai ketua pengawas sekolah dan ketua pelajar.

Sifat-sifat seorang pemimpin yang ada dalam dirinya menyebabkan saya melihat Naim sebagai seorang idola.

Namun, dia sentiasa bersikap mesra dan merendah diri dengan rakan-rakannya dan atas sebab itu, Naim sentiasa dihormati oleh rakan-rakannya.



Naim semasa bersekolah di SMKA Tengku Ampuan Hajjah Afzan, Jerantut.

Namun, kelakuannya kian berubah setelah dia memasuki sekolah menengah. Saya hanya mampu melihat perubahan sikapnya tanpa dapat berkata apa-apa.

Naim yang dahulunya seorang yang periang bertukar menjadi pasif. Sepatah yang ditanya, sepatih yang dijawab. Tidak ada lagi usikan manja dan gelak tawa mencuit hati.

Lebih menyedihkan, Naim hanya mampu terlantar menahan kesakitan di atas katil ketika berusia 17 tahun.

Saya mendapat tahu dia menghidap penyakit autoimun systemic lupus erythematosus (SLE) di mana antibodi seseorang bertindak balas dengan tisu badannya.

Keadaan ini menjejaskan beberapa bahagian sistem tubuh seperti kulit, sendi, buah pinggang, paru-paru, sistem saraf, atau organ-organ lain dalam badan.

Hari demi hari, saya melihat perubahan besar pada fizikalnya. Berat badannya semakin susut dan kelihatan tompok-tompok merah pada pipi, hidung dan telinganya, simptom daripada penyakit tersebut.

Mulut saya sentiasa melafazkan istighfar setiap kali melihat atau mengenangkan penderitaan yang dialami Naim.

Saya dapat merasakan detik untuk Naim pergi meninggalkan kami semakin hampir. Denyutan nadinya semakin lemah dan nafasnya semakin perlahan.

Apa yang kami mampu lakukan hanyalah berdoa serta mengadakan tahlil untuk meminta kesembuhan. Namun, Allah SWT lebih menyayangi arwah.

Kami sekeluarga tidak akan dapat melupakan hari pemergian Naim untuk selama-lamanya dari dunia yang fana ini pada 3 Jun 2016.

Walaupun setelah meningkat usia remaja saya tidak lagi begitu rapat dengan arwah, pemergiannya meninggalkan kesan mendalam dalam diri saya.

Wajah Naim yang ceria semasa dia masih sihat dan kenangan manis bersamanya semasa saya masih kanak-kanak sentiasa kekal dalam ingatan kami.

Semoga Allah SWT mengampuni segala dosa Naim dan menempatkan rohnya dalam kalangan mereka yang beriman dan beramal soleh. Al-Fatihah.



Pusara arwah Naim di Tanah Perkuburan Kampung Machang Manis.